

I Krampus fèsc “furores” a Poza

Gran ejit de publich e mediatich en sabeda ai 2 de dezember te Fascia per la gran defilèda de diaoi.
E a Corvara i “respon” coi agnoi

Evenc - I rejonà de passa 5000 persones ruèdes en sabeda passèda per veder la gran defilèda “satanica” endrezèda dal Grop di “Krampus da Poza” e l'articol sui sfoes regionèi, titolà “Pozza nel terrore”, l'é stat anter i più vardé chisc dis passé. N suzess che vegn ben segur da la moda del

demoniach, ma che se concretisea ence de gra a l'empegn de na sociazion de joegn engaissé che i à la pascion per i Krampus ma che i met dant la segurezza e i se dèsc jù per schivèr ogne sort de dans e dejèjes.

Da l'autra pèrt a Corvara i é dò che i se endreza a la defilèda di

“angeli”. Fenomens de spetacol e de enteress turistich, che desfruta la neva modes e palesa n leam sotil co la tradizion.

N'aon rejonà ence con n antropologh, l professor Cesare Poppi.

De più a piata 9

Duc a Poza a veder i Krampus!

Mile e mile curiosc é rué a vardèr l'invajon di zirca 800 Krampus che à empieni la strèda de Meida con si vic e ac diabolics: n suzess organisatif, turistich e mediatic per i Krampus da Poza

Evenc - Ge volarà spetèr doi egn per veder amò la strèda de Meida doventèr na sort de "infern controlà", descheche l'é stat en sabeda prum de dezember. I Krampus da Poza i la endreza demò n'outa ogne doi egn, ajache i lurier per endrezèr e fèr garatèr dut l'é dalbon gran. "Tacon n an dant a se enjignar - ne à dit i president del Grop di Krampus da Poza, Gianluca Bernard. - Noi sion zirca 20 componenc e dapò amò valgugn che se jonta canche fajon la defilada chiò, e amò volontadives che ne deida, ma i lurier l'é gran. Dant per contatar, endrezar, tegnir i contac e dar le istruzion a duc i gropes che rua, ma soraldut per la roba più

emportanta, che l'é la segurezza: meton proprio n gran empegn per vardar che vae dut ben e nesciugn se fae del mal o abie dan."

Apede a dut i lurier per meter jù le barriere, en sabeda a Poza l'era i studafech, i polins e dapò ence n volontadif che i compagna a ognen di béleche 30 gropes che à tout part.

"Con le facere no se veit fora proprio dalvers - à dit amò i president del Grop di Krampus da Poza - ence per chest l'é emportant saer semper fin olà ruar per far spetacol e far sperder la jent, ma segures de no ge far mal a nesciugn e de no se far mal enstesc."

Segur l'é n event che piase, che l

porta frut ence a livel turistich, ma i domana n muie de temp e empegn.

"Noi aon na gran gaissa - disc amò Gianluca - aon la pascion per i Krampus da canche siane picoi e jiane a sciampar dai diaoi le sere dant da Sèn Nicolò. Ades sé che chesta l'é n'autra roba, noi aon le facere, i bec i se spert ma i sà, le mare le ge disc che noi no sion "veri" diaoi, ma sion demò mascheré. Però per mie cont ence chest l'é portar inant na tradizion, l'é bel e a la jent ge piase. I fajon per se goder, ma ence per far valch per viver i paisc, e fajon dut dalvers, ence rencurar via dut en prescia canche dut l'é fenì. Ma da soi no podassane segur far n gran event



N Krampus con la facera che fèsc tema.

desché chest, donca volesse amò na uta ge dir n gran devalpai a duc, enc e istituzion, sponsor, volontadives e

amisc, che i ne à didà a far garatar dut. La é jita proprio ben e sion n muie contenc". (lg)



Momenc de la defilèda tel paisc de Poza che é binà passa 800 Krampus.